

## **ВО ВТОРНИК ПЕРВЫЯ СЕДМИЦЫ НА ВЕЧЕРА,**

**на Господи воззвах стихиры, глас 2.**

**Подобен, Триоди: Яко явися:**

**С**недию древле горькою, изринувшеся из рая, воздержанием страстей потщимся внити, взывающе Богу нашему: на Кресте прострый длани Твоя, оцет пивый и желчь вкусивый, и болезни претерпевый от гвоздей, горчайшая сласти вся от душ наших изгвоздивый, ради благоутробия щедрот, спаси рабы Твоя.

**Д**рева снедию иногда изгнани бывше из рая, Крестом Твоим вонь вселихомся, егоже в молитву Тебе приводяще Многомилостиве, и верно Ти вси молимся: источники слез ныне нам низпосли, во время воздержания, скверну всю очищающая страстей, и прегрешений наших, да вси Ти вопием прилежно: Господи, слава Тебе.

**Ина стихира, глас 2.**

**Подобен: Содеянных ми:**

**В**оздержания наслаждение и мне Слове даруй, якоже Адаму рай иногда, от всякия Твоя вкушати заповеди Боже наш, и ошаятися присно плода, егоже отрекл еси греха, да живоносную страсть Твою Крестную в радости предварю.

**И в Минеи, 3. Слава, и ныне, Крестобогородичен.**

**Прокимен, псалом 7, глас 6: Господи Боже мой, на Тя уповах, спаси мя.**

**Стих: От всех гонящих мя избави мя.**

**Бытия чтение. [Глава 1, ст. 14 – 23.]**

**Р**ече Бог, да будут светила на тверди небесней, освещати землю, и разлучати между днем, и между ночью: и да будут в знамения, и во времена, и во дни, и в лета. И да будут в просвещение на тверди небесней, яко светити по земли: и бысть тако. И сотвори Бог два светила великая: светило великое в начала дне, и светило меньшее в начала ночи, и звезды. И положи я Бог на тверди небесней, яко светити на землю, И владети днем и ночью, и разлучати между светом, и между тьмою: и виде Бог, яко добро. И бысть вечер, и бысть утро, день четвертый. И рече Бог: да изведут воды гады душ живых, и птицы летающия по земли, по тверди небесней: и бысть тако. И сотвори Бог киты великия, и всяку душу животных гадов, яже изведоша воды по родом их, и всяку птицу пернату по роду: и виде Бог яко добра. И благослови я Бог, глаголя: раститесь, и множитесь, и наполните воды яже в морях: и птицы да умножатся на земли. И бысть вечер, и бысть утро, день пятый.

**Прокимен, псалом 8, глас 5: Господи Господь наш, яко чудно имя Твое по всей земли.**

**Стих:** **Яко** взятся великолепие Твое превыше небес.

**Притчей чтение. [Глава 1, ст. 20 – 33.]**

Премудрость во исходех поется, в стогах же дерзновение водит. На краях же стен проповедуется, у врат же сильных приседит, во вратах же града держаючи глаголет. Елико убо время незлобивии держатся правды, не постыдятся: безумнии же досады суще желателие, нечестивии бывше, возненавидеша чувство, И повинни быша обличением. се предложу вам Моего дыхания речение: научу же вас Моему словеси. Понеже звах, и не послушасте, и простирах словеса, и не внимасте, Но отметасте Моя советы, и Моим обличением не внимасте: убо и Аз вашей погибели посмеюся, порадуюся же, егда приидет вам пагуба. И егда приидет на вы внезапно мятеж, низвращение же подобно бури приидет, или егда приидет вам печаль и градоразорение, или егда найдет на вы пагуба. Будет бо, егда призовете Мя, Аз же не послушаю вас: взыщут Мене злии, и не обрящут. возненавидеша бо премудрость, словесе же Господня не прияша: Ниже хотеша внимати Моим советом, ругахуся же Моим обличением. Темже снedyт своих путей плоды, и своего нечестия насытятся. Ибо, зане обидеша младенцев, убиени будут, и истязание нечестивыя погубит. Мене же слушаый вселится на уповании, и почиет без страха от всякаго зла.

**Таже, Сподоби Господи:**

**На стиховне стихира самогласна дне, глас 8:**

Пост не ошаяние брашен точию совершим, / но всякия вещественныя страсти отчуждение: / да на нас мучительствующую плоть поработивше, / достойни будем причастия, / Агнца за мир закланнаго волею Сына Божия, / и духовно празднуем из мертвых Спасово Воскресение: / на высоту вземшеся добродетелей, / во светлости, и наслаждении изрядных дел, / веселяще Человеколюбца.

**Стих:** **К** Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: \* тако очи наши ко Господу Богу нашему, дондеже ущедрит ны.

Пост не ошаяние брашен точию совершим, / но всякия вещественныя страсти отчуждение: / да на нас мучительствующую плоть поработивше, / достойни будем причастия, / Агнца за мир закланнаго волею Сына Божия, / и духовно празднуем из мертвых Спасово Воскресение: / на высоту вземшеся добродетелей, / во светлости, и наслаждении изрядных дел, / веселяще Человеколюбца.

**Стих 2:** Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, \* и уничижения гордых.

**Мученичен:** Мученицы Твои Господи, / забывше суцая в житии, / нерадивше и о муках, / будущия ради жизни, / сея наследницы явишася: /

темже и со ангелы радуются. / Тех молитвами, / даруй людем Твоим велию милость.

**Слава, и ныне, Крестобогородичен:**

**О** преславнаго чудесе! о таинства новаго! о ужаснаго начинания! Дева глаголаше, на Кресте Тя яко виде, посреде двою разбойнику обешена. Егоже неболезненно ужасно породи, плакаше глаголющи: увы мне Чадо любезнейшее, како Тя лютый народ и неблагодарный, ко Кресту пригвозди?

**И прочее последование, якоже изъявися.**

## **ВО ВТОРНИК ПЕРВЫЯ СЕДМИЦЫ, НА ПОВЕЧЕРИИ**

**по еже реши псалом: Боже в помощь мою:**

**Поем великий канон. Глас 6.**

### **Песнь 1.**

**Ирмос, по дважды: Помощник и Покровитель:**

**Каиново** прешед убийство, произволением бых убийца совести душевней, оживив плоть, и воевав на ню лукавыми моими деяньми.

**Авеле** Иисусе, не уподобихся правде, дара Тебе приятна не принесох когда, ни деяния божественна, ни жертвы чистыя, ни жития непорочнаго.

**Яко** Каин и мы, душе окаянная, всех Содетелю деяния скверная, и жертву порочную, и непотребное житие принесохом вкупе: темже и осудихомся.

**Брение** Здатель живосоздав, вложил еси мне плоть и кости, и дыхание и жизнь: но о Творче мой, Избавителю мой, и Судие кающася приими мя.

**Извещаю** Ти Спасе, грехи, яже содеях, и души и тела моего язвы, яже внутри убийственнии помыслы разбойнически на мя возложиша.

**Аще** и согреших, Спасе, но вем, яко Человеколюбец еси, наказуеши милостивно, и милосердствуеши тепле: слезяща зриши, и притекаеши яко Отец, призывая блуднаго.

**Слава, Троицен:** Пресущная Троице, во Единице покланяемая, возми бремя от мене тяжкое греховное, и яко благоутробна, даждь ми слезы умиления.

**Богородичен:** Богородице, надежде и предстательство Тебе поющих, возми бремя от мене тяжкое греховное, и яко Владычица Чистая, кающася приими мя.

### **Песнь 2.**

**Ирмос: Вонми небо, / и возглаголю, / и воспою Христа / от Девы плотию пришедшаго.**

**Сшиваше** кожныя ризы грех мне, обнаживый мя первыя боготканныя одежды.

**Обложен** есмь одеянием студа, якоже листвием смоковным, во обличение моих самовластных страстей.

**Одеяся** в срамную ризу, и окровавленную студно, течением страстнаго и любосластнаго живота.

**Впадох** в страстную пагубу и в вещественную тлю, и оттоле до ныне враг мне досаждает.

**Любовещное** и любоименное житие, невоздержанием Спасе предпочет ныне, тяжким бременем обложен есмь.

**Украших** плотский образ скверных помышлений различным обложением, и осуждаюся.

**Внешним** прилежно благоукрашением едином попекохся, внутреннюю презрев богообразную скинию.

**Погребох** перваго образа доброту Спасе страстьми, юже яко иногда драхму, взыскав обрящи.

**Согреших**, якоже блудница вопию Ти: един согреших Тебе, яко миро приими Спасе и моя слезы.

**Очисти**, якоже мытарь вопию Ти, Спасе очисти мя: никтоже бо сущих из Адама, якоже аз согреших Тебе.

**Слава, Троицен:** Единого Тя в триех Лицах, Бога всех пою, Отца, и Сына, и Духа Святаго.

**Богородичен:** Пречистая Богородице Дево, едина Всепетая, моли прилежно, во еже спастися нам.

### **Песнь 3.**

**Ирмос:** Утверди Господи / на камени заповедей Твоих, / подвигшееся сердце мое, / яко един Свят еси и Господь.

**Источник** живота стяжах Тебе, смерти низложителя, и вопию Ти от сердца моего прежде конца: согреших, очисти и спаси мя.

**Согреших**, Господи, согреших Тебе, очисти мя: несть бо иже кто согрешит в человецех, егоже не превзыдох прегрешеньми.

**При Нои**, Спасе, блудствовавший подражах, оных наследствовав осуждение, в потопе погружения.

**Хама** онаго душе, отцеубийца подражавши, срама не покрыла еси искренняго, вспять зря возвратившись.

**Запаления** якоже Лот, бегай душе моя греха: бегай Содомы и Гоморры, бегай пламене всякаго безсловеснаго желания.

**Помилуй** Господи, помилуй мя, вопию Ти, егда приидеши со ангелы Твоими, воздати всем по достоянию деяний.

**Слава, Троицен:** Троице простая, несозданная, безначальное Естество, в Троице певаемая Ипостасей, спаси ны верою поклоняющихся державе Твоей.

**Богородичен:** От Отца безлетна Сына, в лето Богородительнице, неiskusомужно родила еси, странное чудо, пребывши Дева, доящи.

### **Песнь 4.**

**Ирмос:** Услыша пророк:

**Б**ди о душе моя! изрядствуй якоже древле великий в патриарсех, да стяжеша деяние с разумом, да будеша ум зряй Бога и достигнеша незаходящий мрак в видении, и будеша великий купец.

**Д**ванадесять патриархов, великий в патриарсех детотворив, тайно утверди тебе лествицу деятельнаго душе моя восхождения: дети, яко основания: степени, яко восхождения, премудренно подложив.

**И**сава возненавиденнаго подражала еси душе, отдала еси прелестнику твоему первыя доброты первенство, и отеческия молитвы отпала еси, и дважды поползнула еси окаянная, деянием и разумом: темже ныне покайся.

**Е**дом Исав наречеса, крайняго ради женонеистовнаго смешения: невоздержанием бо присно разжигаемь, и сластями оскверняемь, Едом именовася, еже глаголется разжжение души любогреховныя.

**И**ова на гноищи слышавши, о душе моя, оправдавшагося, того мужеству не поревновала еси, твердаго не имела еси предложения, во всех яже веси, и имиже искусилася еси, но явилася еси нетерпелива.

**И**же первее на престоле, наг ныне на гноищи гноен: многий в чадах и славный, безчаден и бездомок напрасно: палату убо гноище, и бисерие струпы вменяше.

**Слава, Троицен:** Нераздельное Существом, неслитное Лицы богословлю Тя, Троическое Едино Божество, яко единоцарственное и сопрестольное, вопию Ти песнь великую, в вышних трегубо песнословимую.

**Богородичен:** **И** раждаеши, и девствуеши, и пребываеши обоюду естеством Дева: Рождейся обновляет законы естества, утроба же раждает нераждающая. Бог идеже хочет, побеждается естества чин: творит бо, елика хочет.

## **Песнь 5.**

**Ирмос:** **От** нощи утренююща:

**М**оисеов слышала еси ковчежец душе, водами, волнами носим речными, яко в чертозе древле бегающий дела горькаго совета фараонитска.

**А**ще бабы слышала еси, убивающия иногда безвозрастное мужское, душе окаянная, целомудрия деяние, ныне яко великий Моисей, сси премудрость.

**Я**ко Моисей великий египтянина, ума уязвивши окаянная, не убила еси душе: и како вселишися, глаголи, в пустыню страстей покаянием?

**В** пустыню вселися великий Моисей, гряди убо подражай того житие, да и в купине богоявления душе, в видении будеша.

**М**оисеов жезл воображай душе, ударяющий море, и огустевающий глубину, во образ Креста Божественнаго: имже можеша и ты великая совершити.

**Аарон** приношаше огонь Богу, непорочный, нелестный: но Офни и Финеес, яко ты душе, приношаху чуждее Богу оскверненное житие.

**Слава, Троичен:** Тя Троице славим, Единого Бога: Свят, Свят, Свят еси Отче, Сыне, и Душе, простое Существо, Единице присно покланяемая.

**И ныне, Богородичен:** Из Тебе облечеса в мое смешение, нетленная безмужная Мати Дево, Бог создавый веки, и соедини Себе человеческое естество.

### **Песнь 6.**

**Ирмос: Возопих всем сердцем моим:**

**Волны** Спасе прегрешений моих яко в мори Чермнем возвращающесе, покрыша мя внезапно, яко Египтяны иногда, и тристаты.

**Неразумное** душе произволение имела еси, яко прежде Израиль: Божественныя бо манны предсудила еси безсловесно, любосластное страстей объядение.

**Кладенцы** душе, предпочла еси хананейских мыслей, паче жилы камене, из негоже премудрости река, яко чаша проливает токи богословия.

**Свиная** мяса и котлы, и Египетскую пищу, паче небесныя предсудила еси душе моя, якоже древле неразумнии людие в пустыни.

**Яко** удари Моисей раб Твой жезлом камень, образно животворивая ребра Твоя прообразоваше, из нихже вси питие жизни Спасе, почерпаем.

**Испытай** душе и смотриай, якоже Иисус Навин обетования землю, какова есть, и вселися в ню благозаконием.

**Слава, Троичен:** Троица есмь проста, нераздельна, раздельна Личне, и Единица есмь, Естеством соединена, Отец глаголет, и Сын, и Божественный Дух.

**Богородичен:** Утроба Твоя Бога нам роди, воображенна по нам: Егоже яко Создателя всех моли Богородице, да молитвами Твоими оправдимся.

### **Кондак:**

**Душе** моя, душе моя, / востани, что спиши? / конец приближается, / и имаша смутитися: / воспряни убо, / да пощадит тя Христос Бог, / везде сый, и вся исполняяй.

### **Песнь 7.**

**Ирмос: Согрешихом, беззаконновахом:**

**Кивот** яко ношашесе на колеснице, Зан оный, егда превращуся тельцу, точною коснуся, Божиим искусися гневом: но того дерзновения убежавши душе, почитай Божественная честне.

**С**лышала еси Авессалома, како на естество воста? Познала еси того скверная деяния, имиже оскверни ложе Давида отца: но ты подражала еси того страстная и любострастная стремления.

**П**окорила еси неработное твое достоинство телу твоему: иного бо Ахитофела обретши врага, душе, снизшла еси сего советом: но сия разсыпа Сам Христос, да ты всяко спасешися.

**С**оломон чудный, и благодати премудрости исполненный, сей лукавое иногда пред Богом сотворив, отступи от Него: емуже ты проклятым твоим житием, душе уподобилася еси.

**С**ластями влекомь страстей своих оскверняшеся, увы мне, рачитель премудрости, рачитель блудных жен, и странен от Бога: егоже ты подражала еси умом о душе! сладострастями скверными.

**Р**овоаму поревновала еси не послушавшему совета отца, купно же и злейшему рабу Иеровоаму, прежнему отступнику душе: но бегай подражания, и зови Богу: согреших, ущедри мя.

**Слава, Троицен:** Троице простая, нераздельная, единосущная, и Естество едино, Светове и Свет, и Свята три, и едино Свято поется Бог Троица: но воспой, прослави Живот и Животы, душе всех Бога.

**Богородичен:** Поем Тя, благословим Тя, поклоняемся Ти Богородительнице: яко неразлучныя Троицы породила еси единого Христа Бога, и Сама отверзла еси нам сущим на земли небесная.

## **Песнь 8.**

**Ирмос: Е**гоже воинства:

**Т**ы Озии душе поревновавши, сего проказение в себе стяжала еси сугубо: безместная бо мыслиши, незаконная же дееши: остави яже имаши, и притецы к покаянию.

**Н**иневитяны душе слышала еси кающихся Богу, вретищем и пепелом, сих не подражала еси: но явилася еси злейшая всех, прежде закона, и по законе прегрешивших.

**В** рове блата слышала еси Иеремию душе, града Сионя рыданьми вопиюща, и слез ищуща, подражай сего плачевное житие и спасешися.

**И**она в Фарсис побеже, проразумев обращение ниневитянов, разуме бо яко пророк Божие благоутробие: темже ревноваше пророчеству не солгаться.

**Д**аниила в рове слышала еси, како загради уста, о душе зверей: уведела еси, како отроцы иже о Азарии, погасиша верою пещи пламень горящий.

**В**етхаго Завета вся приведох ти душе, к подобию, подражай праведных боголюбивая деяния, избегни же паки лукавых грехов.



**Слава, Троицен:** Безначальне Отче, Сыне собезначальне, Утешителю Благий, Душе Правый: Слова Божия Родителю, Отца безначальна Слове, Душе живый, и зиждяй, Троице Единице помилуй мя.

**Богородичен:** Яко от оброщения червленицы Пречистая, умная багряница Еммануилева, внутрь во чреве Твоем плоть исткася. Темже Богородицу воистинну Тя почитаем.

## **Песнь 9.**

**Ирмос: Безсеменнаго зачатия:**

Христос искушашеся, диавол искушаше, показуя камение, да хлеби будут: на гору возведе видети вся царствия мира во мгновении. Убойся о душе, ловления, трезвися молися на всякий час Богу.

Горлица пустынолюбная, глас вопиющаго возгласи, Христов светильник, проповедуяй покаяние, Ирод беззаконнова со Иродиадою. Зри душе моя, да не увязнеши в беззаконныя сети, но облобызай покаяние.

В пустыню вселися благодати Предтеча, и Иудея вся и Самария слышавше течаху, и исповедаху грехи своя, крещающиеся усердно: ихже ты не подражала еси душе.

Брак убо честный, и ложе нескверно: обоя бо Христос прежде благослови, плотию ядый, и в Кане же на браце воду в вино совершая, и показуя первое чудо: да ты изменишися о душе.

Разслабленнаго стягну Христос, одр взявша, и юношу умерша воздвиже, вдовиче рождение, и сотника отрока, и самаряныне явися, в Дусе службу Тебе, душе предживописа.

Кровоточивую исцели прикосновением края ризна Господь: прокаженныя очисти: слепыя и хромыя просветив, исправи: глухия же и немыя, и ничащия низу исцели словом: да ты спасешися окаянная душе.

**Слава, Троицен:** Отца прославим, Сына превознесем, Божественному Духу верно поклонимся, Троице нераздельней, Единице по Существо, яко Свету, и Светом, и Животу, и Животом: животворящему, и просвещающему концы.

**Богородичен:** Град Твой сохраняй Богородительнице Пречистая: в Тебе бо сей верно царствуй, в Тебе и утверждается, и Тобою побеждай, побеждает всякое искушение, и пленяет ратники, и проходит послушание.

**Андрею:** Андрее честный, и отче преблаженнейший, пастырю Критский, не престай моляся о воспевающих тя, да избавимся вси гнева, и скорби, и тления, и прегрешений безмерных, чтущии твою память верно.

**Таже поем оба лика, ирмос: Безсеменнаго зачатия:**

**И прочее последование Повечерия.**

## **В СРЕДУ ПЕРВЫЯ СЕДМИЦЫ НА УТРЕНИ.**

**По 1-м стихословии седален Осмогласника.**

**По 2-м же стихословии седален, глас 2:**

**Подобен: Благообразный Иосиф:**

Страстьми Твоими всем безстрастие / давший Человеколюбче, / страсти плоти моя умертвив / Твоим Крестом, / Божественную сподоби страсть видети, / постом благоугождающа славе Твоей, / да приму богато велию милость.

**Слава, тойже:**

**И ныне, Крестобогородичен, глас тойже.**

**Подобен: Милосердия сущи:**

Дева и Мати Твоя Христе, / на Древе зрящи Тя мертва простерта, / плачущи горько, / Сыне Мой, глаголаше, / что страшное сие таинство, / всем даруяй живот вечный, / волею на Кресте како умираеши, / смертью поносною?

**По 3-м стихословии седален, глас 2:**

**Подобен: Животворящий:**

Светотворное время, / егоже ныне освятил еси и даровал еси нам / воздержания Господи, / Ты сподоби нас во умилении / всех чисте прейти мирствующих, / Креста крепостию, / едине Человеколюбче.

**Слава, тойже:**

**И ныне, Крестобогородичен, глас тойже.**

**Подобен: Милосердия двери:**

Честным Крестом Сына Твоего сохраняеми Владычице / Чистая Богородице, / всякий прилог борителя вси удобно низлагаем. / Темже Тя по долгу ублажаем, / яко Матерь Света, / едину надежду душ наших.

**Таже чтение в Лавсаице. Псалом 50.**

**Канон в Минеи. И трипеснец, глас 2.**

**Песнь 3.**

**Ирмос: Прощела есть пустыня:**

Распнем уды воздержанием, трезвимся в молитвах, якоже писано есть, и по следу жительствуим Пострадавшего, и страсти умертвившаго.

Изблевавше горький грех, потщимся волею желчь вкусившему угодили Христу, Крестом низложившу злоначальника.

Обычай взем грех, влечет мя во всеконечную пагубу: но Ты мя от сея избави Крестом Твоим, Щедре многомилостиве.

**Богородичен:** Владычествующая всеми тварьми Владычице, яко Владыку рождши, работы мя свободи льстиваго, и одинаго борца.

**Иный, глас тойже.**

**Ирмос:** Утверди нас в Тебе Господи, / Древом умерщвей грех, / и страх Твой всади в сердца / нас поющих Тя.

Древо Крестное воздержание миру процвете, еже любовию обლობызавше, насладимся всеплодия Божественных заповедей Христовых.

Воздержание страстей и ныне носяще, плоть распнем Господеви, и мертвенно тоя мудрование покажем вси божественней жизни.

**Слава, Троицен:** Три Лица одинаго зрака славлю, Отца, Сына, и Духа, едину державу Божества, Царство всех, и светлость.

**Богородичен:** Рождество Твое, Чистая, страшно бысть: Бог бо есть вочеловечивыйся, безначально из Отца родивыйся, и из Тебе напоследок кроме мужа рождься.

Слава Тебе Боже наш, слава Тебе.

Распятие пою и прободение Божественных ребр Твоих, из нихже питие безсмертное черплю всегда Христе, и освящаюся.

**Ирмос:** Утверди нас в Тебе Господи, / Древом умерщвей грех, / и страх Твой всади в сердца / нас поющих Тя.

**Песнь 8.**

**Ирмос:** Пещь иногда огненная в Вавилоне:

Пещь страстей распалает душу мою, но росою милости Твоя сию увяди, источивый безстрастия токи из нетленных Твоих ребр, распинаемь Благодетелю многаго ради снизхождения.

Вознесл еси ны падшия в злобу на Кресте Твоим вознесением Христе: темже поползшася в пропасть греха, возведи, и утверди мя на камени спасения, яко да славлю державу Твою.

Копием Твоим Христе, страстей гноение очистив от сердца моего, всего мя исцели, егоже змий уязви зубы ядовитыми, и даждь ми непоколебимо к Божественным стезям ходити.

**Богородичен:** Тебе светлую свещу, и свещник, в нейже огонь Божества вселься, просвети нощною одержимых тлею, Нескверная: чтим вси благословяще, благословенная Рождество Твое.

**Иный.**

**Ирмос:** В купине Моисею Девы чудо, / на Синайстей горе, / прообразившаго иногда, / пойте, благословите, / и превозносите во вся веки

**П**осреде разбойник Распятого на Древе, и копием прободенаго в животочная ребра, пойте, благословите, и превозносите во вся веки.

**С**удяй всей земли, судищу предстал еси, заушен был еси, и поруган, на Кресте повешен был еси, от тли мя пременяя древняго греха во вся веки.

**Б**лагословим Отца, и Сына, и Святаго Духа, Господа.

**Троичен:** Божество едино Троица, нераздельное Естество, раздельное же Лицы, непоколебимая державо, Отче, Сыне, и Душе, Тебе песнословим во вся веки.

**Богородичен:** Богородительнице Чистая, небесная врата, спасительная двере всех христиан моления прими, блажащих Тя во вся веки.

Слава Тебе Боже наш, слава Тебе.

**К**ресте Христов, разбойника наставивый к вере, и мене к течению благосильно постом сподоби предварити на поклонение Твое, и оживотворитися.

**Х**валим, благословим, покланяемся Господеви, поюще и превозносяще во вся веки.

**Ирмос:** В купине Моисею Девы чудо, / на Синайстей горе, / прообразившаго иногда, / пойте, благословите, / и превозносите во вся веки.

## **Песнь 9.**

**Ирмос:** Безначальна Родителя:

**С**олнца светлее пост возсиявый многосветлая благодать, благовествует всем Крестныя лучи, и зари честныя страсти, и Воскресения день спасительный.

**Ч**истоту возлюбим, блуда отбежим, чресла целомудрием препояшим: яко да чисти явимся Чистому, и единому от всех ищущему чистоты, Спасу душ наших.

**Х**ристе, страху Твоему пригвозди плоти моя, Кресту пригвоздивый грех Адамов, разреши зол моих соузы лукаваго сокруши стрелы, копием Твоим Владыко, и сего вреда избави мя.

**Богородичен:** Судию праведнейшаго и единого благоуветливаго рождшая Дево Христа Господа, избави мя суда Отроковице, и огня и мучения, яже ми исходатаи греха наслаждение.

## **Иный.**

**Ирмос:** Чистую и Пречистую Матерь и Деву, / песнями песней вси вернии / благочестно яко Богородицу / величаем.

**О** благоутробия Твоего! Яко Крест претерпел еси, гвоздие и копие Господи, мене ради осужденнаго тлею: темже пою Тя Христе.

**Кресту**, трости, гвоздием и копию, жизненным Твоим стражем, вси людие покланяющиеся песньми Христе поем Тя.

**Слава, Троицен:** Единице триипостасная Троице единственная, господоначальная! Естество равнославное, Отче, Сыне, и Божественный Душе, спаси всех нас.

**Богородичен:** Радуйся очистилище миру Богородице, в неже прибегше вси грешнии, к Богу примирения присно обретаем.

**Слава Тебе Боже наш, слава Тебе.**

**Крестом** Твоим Господи, и мене укрепив, постов мне даруй Благий благомошно скончати обхождение.

**Ирмос:** Чистую и Пречистую Матерь и Деву, / песньми песней вси вернии / благочестно яко Богородицу / величаем.

**Светилен.**

**На стиховне самогласен дважды. Глас 8:**

**Постом**, помышлений страсти, / приидите поработим, / духовными себе крилы покрывше: / да вражию движимую бурю легче прешедше, / достойни будем Крестнаго поклонения, / о мире закланнаго волею Сына Божия: / и духовно празднуем из мертвых / Спасово Воскресение, / на гору вземшеся, со ученики прославим, / власть приимшаго всю, / Сына от Отца, Человеколюбца.

**Мученичен:** Мученицы Христовы непобедимии, / победивше прелесть силою Крестною, / восприяте благодать вечныя жизни, / мучителей прещения не убоястися, / муками ураняеми веселитися: / и ныне крови ваша, / быша исцеления душ наших: / молитесь спастися душам нашим.

**Слава, и ныне, Крестобогородичен, глас тойже:**

**Что** зримое видение, / еже моими очесы зрится, о Владыко? / Содержай всю тварь, на Древо вознесен еси, / и умерщвлен всем даруяй живот: / Богородица плачущи глаголаше, / егда зряше на Кресте Всечистая, / из Нея неизреченно возсиявшаго / Бога и Человека.

**И час 1-й, со стихословием и обычными поклоны: и отпуст.**

## **НА 6-М ЧАСЕ ТРОПАРЬ ПРОРОЧЕСТВА, ГЛАС 4:**

**Веси** создание наше, / **веси** немощь нашу Человеколюбче: / **согрешихом**, но не отступихом от Тебе Боже, / **ниже** воздыхом руки наша к богу чуждему, / **пощади** нас Твоею / **благостию** Благоутробне.

**И повторяем тойже.**

**Таже прокимен, псалом 9, глас 4: Исповемся** Тебе Господи, **всем** сердцем моим.

**Стих: Возвеселюся и возрадуюся** о Тебе.

### **Пророчества Исаиина чтение. [Глава 2, ст. 3 – 11.]**

**Тако** глаголет Господь: от Сиона изыдет закон, и слово Господне из Иерусалима. И судити будет посреде язык, и избличит люди многи: и раскуют мечи своя на орала, и копия своя на серпы, и не возмет язык на язык меча, и не навькнут ктому ратоватися. И ныне доме Иаковль, приидите, пойдём светом Господним. Остави бо люди своя дом Иаковль: зане якоже из начала наполнися страна их волхвований, якоже иноплеменников, и чада многа иноплеменнича родишася им. Наполнися бо страна их сребра и злата, и не бяше числа сокровищ их: и наполнися земля их коней, и не бяше числа колесниц их. И наполнися земля мерзостей дел рук их, и поклонишася тем, яже сотвориша персты их: И преклонися человек, и смирися муж, и не претерплю им. И ныне внидите в камения, и скрыйтесе в землю от лица страха Господня, и от славы крепости Его, егда встанет сокрушити землю. Очи бо Господни висоцы, человек же смирен: и смирится высота человеческая, и вознесетсе Господь един в день оный.

**Прокимен, псалом 10. Глас 6: Праведен** Господь, и правды возлюби, **правоты** виде лице Его.

**Стих: На** Господа уповах, **како** речете души моей?

**И прочее** последование часов, **яко** предучинися, и отпуст.